

Emprova da revocar la decisiun dals meds d'instrucziun

■ (anr/vi) ler ha il cussegl grond prendì enconuschientscha da la "petiziun rumantsch grischun" da la vischnanca da Zuoz. **Martin Candinas (pcd/ Cadi) ha fatg ina proposta cun la finamira da reponderar la decisiun davart ils meds d'instrucziun rumantschs. Lezs cumparan d'avegnir da l'onn proxim be pli en rumantsch grischun. La proposta è vegnida refusada cun 57 cunter 16 vuschs.** Ils deputads han approvà cun 82 cunter 1 vusch la proposta da la cumissiun da prender enconuschientscha da la «petiziun rumantsch grischun» e d'examinar ulteriuras dumondas dals petiziunaris. *Jon Domenic Parolini* (pps/Suot Tasna) è stà il sulet deputà che ha votà cunter la cumissiun. En la discussiun ha el avertì: La petiziun mussia bain tge che la populaziun pensa davart questa tematica. «Tenor mes avis èsi necessari d'integrar bler pli fitg las regiuns en las decisiuns.» Parolini ha era avertì ch'i na saja betg

l'ultima giada ch'il rumantsch grischun en scola vegnia discussa en il cussegl grond e ch'il chantun vegnia insacuras a stuir prender enconuschientscha dals quitads dal pievel.

Tuns conciliants dad Arquint

Tuns plitost conciliants èn stads d'udir da *Romedi Arquint* (ps/Engiadin'Ota). Il concept da basa ch'il chantun haja uss preschentà per l'introducziun dal rumantsch grischun en scola relativeschia bleras resalvas. Impurtant saja cunzunt ch'i vegnia uss sclerì dumondas giuridicas en connex cun l'autonomia da vischnancas. Il concept na prevessia era betg immediat ina introducziun obligatoria, ha Arquint ditg. Encunter lezza sa dustass l'entira magistraglia da l'Engiadina.

Arquint è savens s'exprimì pli critic pertutgant l'introducziun dal rumantsch grischun en scola. En la votaziun ha el lura votà cunter la cumissiun e per la proposta Candinas.

Proposta Candinas

Il suppleant *Martin Candinas* (pcd/Cadi) ha proponì da stritgar ord la proposta da cumissiun il pled «ulteriur». Questa pitschna midada redacziunala avess fatg grond effect, numnadain che la regenza u il cussegl grond avess anc ina giada examinà u eventualmain schizunt reponderà la decisiun da far ils meds d'instrucziun be pli en rumantsch grischun. Sustegn ha Candinas obtegnì dal suppleant *Luzi Schucan* (pld/Engiadin'Ota). En tut han 16 deputads votà per stritgar il pled «ulteriur».

La gronda part dal cussegl ha votà per la versiun da la cumissiun che «envida la regenza da examinar las ulteriuras dumondas dals petiziunaris», quai vul dir, senza revegnir anc ina giada a la decisiun dals meds d'instrucziun. En connex cun il concept per l'introducziun dal rumantsch grischun en scola duain las autras resalvas dals petiziunaris dentant vegnir examinadas e tut tenor era resguardadas.